

**Intervensi Najib tidak pinggir golongan muda - Irmohizam
Astro Awani
20 Januari 2015**

KUALA LUMPUR: Pengubahsuaian dan intervensi yang diumumkan Perdana Menteri, Datuk Seri Najib Tun Razak disifatkan langkah penting untuk memastikan dasar negara termasuk kepada golongan muda tercapai walau faktor ekonomi antarabangsa berada di luar kawalan negara.

Presiden Majlis Belia Selangor, Datuk Irmohizam Ibrahim berkata, ia merupakan langkah yang cukup penting dalam memastikan objektif dasar-dasar negara dapat dicapai, serta dapat dikatakan kini satu langkah yang paling proaktif.

"Pengubahsuaian dan intervensi seperti yang diumumkan Najib hari ini bagi menghadapi landskap ekonomi dunia yang berubah adalah tepat pada masanya, apatah lagi, kejatuhan harga minyak sebanyak 60 peratus membawa implikasi kepada ekonomi dunia, dan Malaysia tidak terkecuali.

"Intervensi ini jelas menunjukkan Kerajaan sentiasa peka dan proaktif dalam memastikan bahawa Malaysia sentiasa diletakkan di atas landasan ekonomi yang tepat serta dapat mengharungi cabaran ekonomi pada setiap masa," katanya dalam satu kenyataan di sini hari ini.

Najib pada Selasa mengumumkan, perbelanjaan pembangunan yang diperuntukkan sebanyak RM48.5 bilion bagi tahun ini tidak berubah dan akan tetap dibelanjakan.

Menurutnya, projek-projek bersifat ekonomi rakyat yang dilaksanakan termasuk perumahan rakyat, tebatan banjir, bekalan air, elektrik dan infrastruktur pengangkutan awam.

Irmohizam yang juga Ahli Parlimen Kuala Selangor turut mencantas dakwaan sesetengah pihak yang mengatakan bahawa ini adalah tindakan reaktif kerajaan dan bukan proaktif.

"Kita harus menyedari bahawa keadaan iklim dunia pada masa kini adalah kerana faktor-faktor luaran yang berada di luar kawalan. Dan, dengan pengubahsuaian dan intervensi ini, kita dapat capai defisit negara dibawah 3.2 peratus pada tahun 2015 dimana tanpa langkah khusus ini maka kadar defisit dapat meningkat sehingga 3.9 peratus.

"Kita juga tidak melaksanakan pakej-pakej stimulus seperti dalam keadaan gawat atau krisis, yang boleh dikatakan reaktif. Maka, ini sememangnya tindakan proaktif Kerajaan

untuk memastikan daya tahan ekonomi negara terus meningkat," jelasnya.

Jelasnya, penguatkuasaan Cukai Barang dan Perkhidmatan (GST) pada 1 April ini serta Rancangan Malaysia ke-11 yang bakal diumumkan pada bulan Mei nanti pastinya akan menjadi pelengkap dalam menjadikan Malaysia negara maju menjelang 2020.

"Saya juga amat berharap harga barangan keperluan asas tidak akan meningkat dan pihak kerajaan perlu memperkukuhkan elemen penguatkuasaan agar keyakinan yang diberikan tidak terhakis.

"Kementerian berwajib perlu dipertanggungjawabkan bagi mengawal harga barangan supaya kehidupan rakyat tidak terbeban," ujarinya.

Kata Irmohizam lagi, dia turut mengharapkan kerajaan dapat menurunkan harga tarif elektrik bagi kegunaan rakyat memandangkan harga bahan api dan minyak yang semakin menurun kini.

Copyright © Astro Awani Network Sdn. Bhd. 2015 (535275-D). All Rights Reserved.

Source: <http://www.astroawani.com/berita-malaysia/intervensi-najib-tidak-pinggir-golongan-muda-irmohizam-52461>